

bique ipsis fallaciam facerent. Etenim satis superque compertum est, illos non modo remoras omnes, sed & cuncta, quam maxime Paci adversantia, meditari. Hactenus aperto Marte nos aggressi sunt, nunc Arte operta insidias struunt, & rei sanctissimæ simulatione (pro facinus!) pulcherrimam Imperii molem, latentibus cuniculis student convellere. Pugnare, bellare, hostilia agere, Hostium est. Belli componendi obtentu, pejora bello agitare, perfidorum. Nusquam gentium simile quid auditum, nisi apud Poenos forte aut Mahometanos, quorum illi quibuscum bellamus, aut Succedanei, aut Socii. Majores nostri, Virtuti omnia prona esse docuere, jamque olim apud Tacitum exclamarunt: Nullos mortaliū, armis aut fide ante Germanos esse.* Nos degeneres (pudet dicere!) Bello nos vinci, & Pacis illecebris circumveniri, inermes & incauti patiemur? Si animus adsit, vires non desunt: ambigua, si divisa; acres, si conjuncta. Nos unus populus, unus sanguis sumus, nos gentiles, nos cognati,

* Annal. XIII.